



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL**

***Komunikadu Imprensa
19 Abril 2013***

Tribunál kondena arguidu ba pena multa iha kazu violénsia doméstika

Iha 19 Abril 2013 Tribunál Distritál Dili kondena arguidu ne'ebé halo agresaun hasoru ninia kónjuje ho pena multa \$30.

Ministériu Públiku akuza katak iha tinan 2011 arguidu tolok lezada, buti lezada nia kakorok, riba ba rai, soku lezada dala rua no tebe dala rua. Violénsia ne'e kauza lezada hetan raan iha matan fukun. Arguidu komete violénsia ne'e tanba lakohi ba partisipa seremónia funerál (koremetan) ne'ebé halo husi família lezada nian tanba limitasaun kondisaun família.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuja ho artigu 35 Lei Kontra Violénsia Doméstika.

“JSMP enkoraja Ministériu Públiku no tribunál atu konsidera indemnizasaun sivíl ba vítima no pena apropriadu atu reabilita agresór sira,” dehan Diretor Ezekutivu JSMP, Luis de Oliveira Sampaio.

Iha julgamentu arguidu konfesa ba akuzasaun ne'e. Tribunál rona katak arguidu no lezada konsilia ona, iha oan na'in 13, ema agrikultór no arguidu arepende no responsavel ba família.

Iha alegasaun final Ministériu Públiku husu ba tribunál aplika pena admoestasaun. Defeza konkorda ho pena ne'ebé mak Ministériu Públiku husu.

Tribunál decide pena multa ba laron 60, kada laron \$0.50 ho total \$30. Karik kondenadu la selu multa, sei ba prizaun ba laron 40.

Kazu ne'e rejista iha tribunál ho Número Prosesu: 551/2012/TDDIL. Julgamentu prezide husi juis Dr. Julio Gantes (Juis Internasionál), Dr. Nelson Carvalho representa Ministériu Públiku no arguidu hetan defeza husi Dr. Andre C. Zeroto Advogadu Internasionál.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883 / 77810637

www.jsmp.tl